



## ЗМІНЫ!

**ЗАПИС із дискусії учасників о актї переда-  
ня авторських прав на выдаваня Народных  
новинок властника – обчаньского здружіня  
Русин і Народны новинкы (OZ Rusín a Ľudo-  
vé poviny) обчаньскому здружіню Русиньска  
оброда на Словеньску (OZ Rusínska obroda  
na Slovensku), платного од 1. януара 2017.**

1. Тот запис буде опублікований на 1. сторінці Народных новинок ч. 12/2016 і на 1. сторінці ІнфоРусина 24/2016.

2. Сучасный шефредактор Народных новинок Александер Зозуляк добровольно ся вздавать функції шефредактора Народных новинок по 25 нелегких роках коло Народных новинок.

3. Схвалений акт переданя авторських прав на выдаваня Народных новинок обчаньскому здружіню Русиньска оброда на Словеньску буде платный од 1. 1. 2017.

4. А. Зозуляк, К. Копорова і А. Плішкова высловлює подмінку дале выдавати Народны новинкы новым субектом – Русиньска оброда на Словеньску подля сучасно платных правил русиньского правопису.

5. Односно забезпечіня 4. пункту запису спомянута тройця пропонує, жебы од 1.1. 2017 робила языкову редакторку Народных новинок Кветослава Копорова, як то было за їх выдаваня ОЗ Русин і Народны новинкы.

6. Односно пункту ч. 4 буде рішати Координачный выбор Русиньской оброды на Словеньску, як найвысший орґан міджі сеймами, котрый має єдиный право рішати діла односно редакції, котрой є орґанізація зряджователём.

7. Односно пункту ч. 5. Петро Медвідь бы в припадї зьєдиніня новинок ІнфоРусин і Народны новинкы, далше зохабив на позиції языкового редактора Анну Кузмякову.

8. Новинкы бы в припадї зьєдиніня выходили зо старым лоґом із року 1991– НН (Народны новинкы), як: НН інфоРусин.

9. Далшы деталлы односно выдаваня новинок в будучности, котры не были проїднаны на тім засіданю, можуть быти доїднаны міджі участныма дискусії о переданю авторських прав по засіданю КВ РОС, ку чому собі представителі дискусії з боку РОС выжадають мандат.

**В Пряшові 25. октября 2016**

*(Продовжіня на 2. стор.)*



• 25. октября 2016 в засіданні ІРЯК ПУ у Пряшові зышло ся шестеро учасників дискусії о переданю авторських прав на выдаваня Народных новинок: (зліва) А. Плішкова, А. Кузмякова, К. Копорова, А. Зозуляк, П. Медвідь і М. Караш.

Фотка: Зденка Цітрякова



• В рамках міджінародной научной конференції, котра з половины была присвячена особности доц. ПгДр. Василя Ябура, к. н., передала з нагоды ёго 80. народенин Премію Александра Духновича за вызначне діло про Русинів у формі бронзової сошки карпатського медвідя директорка Інштїтуту русиньского языка і культуры Пряшівской універзіты (ІРЯК ПУ) доц. ПгДр. Анна Плішкова, ПгД.

## Научна конференція Інштїтуту русиньского языка і культуры Пряшівской універзіты

3. – 4. новембра 2016 на Інштїтуті русиньского языка і культуры Пряшівской універзіты (ПУ) у Пряшові одбыла ся міджінародна научна конференція під назвов *Дінамічны процеси в сучасній славїстїці*, котра была присвячена 80. народенинам доц. ПгДр. Василя Ябура і 20. річницї заложіня лекторату булгарьского языка на ПУ. Подія мала богатый научный і культурно-сплоченьский програм і была барз добрі зорґанізована.

Главно заграничны учасници конференції были прияты уж 2. новембра 2016 і вшыткым было присвячене выступлїня з гров Фантазія Козмы Прудкова у Театрі Александра Духновича в Пряшові. Сама конференція была отворена на другый день і почас дообідняйшого програму выступили дакотры вызначны гостї, міджі нима была і амбасадорка Булгарії на Словакії Сїй Ексцеленція **Маргарїта Ганева**. Окрем іншого підкреслила думку о тім, же *„мы Славяне маєме ся все вертати ку своїм корінём, што є актуалне главно в сучасности“*. Тоту ідею підсилив дас годиновый документарный фїлм, котрый зо собов принесли булгарьскы колеґове. Фїлмовый документ был присвяченый традиціям Кіріла і Мефодія в Булгарії і на Словакії. Тот фїлм был бы потребный главно про нашы школы. У вступній части події выступили так істо булгарьскы лекторы на ПУ.

Вшыткых учасників конференції приняв в менї ректора ПУ проф. ПгДр. Мілан Портік, ПгД. К учасникам ся приговорив і директор Центра языків і культур народностных меншын ПУ проф. ПгДр. Петер Каша, к. н., і директорка Інштїтуту русиньского языка і культуры ПУ доц. ПгДр. Анна Плішкова, ПгД. За Русиньску оброду на Словеньску выступив ей председа **Інж. Мартін Караш і Мґр. Анна Кузмякова**. Якраз у ей выступлїню был интересным способом представленый живот і творчость нашого юбіланта. Наісто ёго найвекшым вкладом до русиньского духовного і культурного жывота є **кодїфікація русиньского літературного языка на Словакії**, котрому доц. Ябур присвячує основну часть свого професіонального жывота. Тото діло оцінили вшыткы учасници конференції. Наісто у зачатках боя за русиньскый язык наш юбіланта не міг собі представити, же раз на ёго честь буде выступати тільки домашніх і заграничных фїлологів, а міджі нима буде і представитель русиністїкы з Японії! Єден із вічных законів говорить: *„Што засїєш, то зожнеш“*. Доц. В. Ябур і ёго найблишты сполупрацовници засяли русиньскый дух барз одповідно і з великым ентузіазмом, а теперь жнуть главно щїры і вдячна слова узнання. **Є істов символіков, же кодїфікатор русиньского языка має тот істый день народжіня як Людовіт Штур – 28. октобер**. І на тім місцю жадать ся зажелати нашому юбілантові:

*„Многая літ, благая літ,  
Добры весла, точне перо,  
Най го тішыть тот наш світ,  
Най му буде фурт весело“*.

На конференції прозвучали выступлїня главно з области русиністїкы, но окремы рефераты были присвячены і іншым фїлологічным темам, главно в области славїстїкы. Малоколи ся стає, жебы на зачатку конференції уж был к діспозїції зборник рефератів і выступлїнь з той конференції. (Статю о зборнику публікуєме на 2. стор. тых НН). О то легше ся было мож познакомити з окремыма темами. Наісто собі за тот почін заслужать узнання члены Інштїтуту русиньского языка і культуры ПУ. Много сил про тото діло жертвовала, як і приправі ай успішному ходу конференції – **ПгДр. Кветослава Копорова, ПгД**. Цїлый ход научной події мав барз добру атмосферу, в чім мать велику заслугу проф. ПгДр. **Юлія Дудачова, др. н.**, котра была душов научной конференції. Споминана подія ся могла реалізувати главно за помочи научному проекту *Дінамічны процеси в сучасній языкознавательській славїстїці* VEGA č. 1/0072/14(2914-2916), котрого ведучоу рішытельков є праві проф. Дудашова.

Цїнности творять люде, а в области русиністїкы і цілого жывота Русинів запалены люде вытворили діло, котре створює передусловія про далший розвой той карпаторусиньской народности на Словакії. В старых мудрых книжках ся пише: *„Народы суть квітами Землі“*. На подобных научных і культурно-сплоченьских подїях собі барз живо усвідомлюєме, же *„каждый народ є частёв великой людской букеты“*.

Проф. ПгДр. Осиф СІПКО, ПгД.